

18 JUN 2002

Mahathir-Hudud (Bergambar)

KERAJAAN AKAN HALANG HUDUD T'GANU JIKA ADA KUASA, KATA DR M

KUALA LUMPUR, 18 Jun (Bernama) -- Kerajaan persekutuan akan menghalang pelaksanaan undang-undang Jenayah Syariah Terengganu yang tidak adil dan bertentangan dengan ajaran Islam jika ia mempunyai kuasa untuk berbuat demikian, kata Perdana Menteri Datuk Seri Dr Mahathir Mohamad.

"Kerajaan akan tengok apa kuasa kerajaan persekutuan dalam perkara ini dan kalau ada kuasa, kerajaan akan menghalang pelaksanaan undang-undang yang tidak adil...yang bertentangan dengan ajaran Islam.

"Undang-undang yang dicadangkan oleh PAS itu bukannya undang-undang Islam tetapi "undang-undang Hadi (Datuk Seri Abdul Hadi Awang)...undang-undang PAS," katanya menjawab pertanyaan pemberita selepas membuka Ekspo Pemuda Umno di Pusat Dagangan Dunia Putra di sini, hari ini.

Ekspo Nasional Usahawan Pemuda Bumiputera itu dianjurkan sempena perhimpunan agung Umno selama lima hari, bermula hari ini.

Dr Mahathir, yang juga Presiden Umno, berkata PAS telah menyimpang daripada ajaran Islam yang sebenar dan parti pembangkang itu tidak menekankan ajaran Islam yang betul dan sebab itu mereka sanggup berkata macam-macam.

"Mereka menghina tuhan, kata tuhan mencarut dan macam-macam lagi...tuhan samseng, saya tak tahulah tuhan mana yang dia sebut tapi tuhan saya tak samseng," katanya.

Beliau berkata Umno mengikut ajaran Islam yang sebenar dan ini menjadi asas parti.

"Umpamanya kita tidak boleh dengan mudah mengkafirkan orang...ini ajaran yang jauh daripada Islam...sampai tak boleh kahwin sesama orang Islam kononnya orang itu tak Islam...itu bukan Islam (sebenarnya).

"Ini sama dengan undang-undang yang dia (PAS) bentuk itu, (dan) itu bukan undang-undang Islam. Undang-undang Islam mesti adil, ini (pula) undang-undang yang tidak adil. Orang yang jadi mangsa kena dera, penjenyah terlepas, undang-undang apa itu? bukan undang-undang Islam itu," katanya lagi.

Dr Mahathir berkata langkah PAS untuk melaksanakan undang-undang Jenayah Syariah itu sebenarnya menghina Islam kerana membuat satu undang-undang yang kononnya undang-undang Islam "tetapi tidak ada keadilan."

Beliau berkata Abdul Hadi, Menteri Besar Terengganu, ingin melaksanakan undang-undang itu bukan kerana ianya undang-undang Islam tetapi untuk mencari isu politik.

"Nak tunjuk kononnya dialah yang melaksanakan hukum Islam, tetapi apa (yang) dia nak laksanakan itu bukan hukum Islam, itu hukum PAS. Hukum Islam tidak ada yang tidak adil, semua hukum Islam adil, kalau sesuatu hukum itu tidak adil, ia bukan Islam dan jelas sekali dia punya undang-undang (itu) tidak adil," kata Dr Mahathir.

Ditanya jika undang-undang negeri itu boleh dilaksanakan memandangkan terdapat undang-undang lain yang boleh digunakan untuk kesalahan yang sama, Perdana Menteri berkata perkara ini perlu dirujuk kepada pakar undang-undang.

"Saya bukan pakar undang-undang tapi kalau nak tanya sama ada dia boleh atau tidak itu kena rujuk kepada Peguam Negara," katanya.

Beliau berkata mereka yang menggubal dan meluluskan undang-undang Jenayah Syariah itu akan buat dosa kerana meluluskan undang-undang yang tidak adil dan bila mati dia akan hadapi neraka kerana membuat

undang-undang yang sebenarnya bukan undang-undang Islam.

"Sebab dia yang memburukkan imej Islam...dia akan terima balasan di akhirat," katanya.

-- BERNAMA

SR ZS RON